

古典文學 佳作 許嘉璋

個人簡介：政治大學中文系博士班七年級

許嘉璋，七年級生，新竹中學畢業，中興大學中文學士，政治大學中文碩士，博士班。曾獲宗教文學獎、台北文學獎、大墩文學獎、時報文學獎以及中興湖文學獎等。作品偶見於副刊，自費出版詩集《七武海——十四行詩集》(2015)。

鵲城懷古六首

見路名有感

輿圖重議定乾坤，行過金門越廈門。南渡王孫離別意，長安重置慰心魂。

訪士林官邸

一夕偏安萬馬暗，數盆幽菊柏森森。何當介石平功過？更賴雙溪仔細吟。

過師範大學

鏗然風雨讀書聲，莫道儒生事不成。舉世浮華仁義遠，誰於此處覓高明？

過臺灣大學

煙雨京華夢裡逢，杜鵑窗外自喁喁。椰林日下風初靜，拄杖龍坡一老農。

過世新大學

山階草木各恬然，忽發幽情憶哲賢。欲向巒宮尋舍我，其人仙跡已翩翩。

過政治大學

誰解談天論九州？憑欄無語自登樓。風生兩腋疑茶醉，醉夢溪前一野鷗。

南投歌行四首

霧社

兵甲裂處聲特特，憶此常令心悽惻，前塵如霧不可得，欲問日照何顏色？卻道蕃

民風俗刁，認石為祖虹做橋。一朝應劫土已焦，木葉隨風更蕭蕭。待到春來新櫻發，斑斑在目舊征伐，碑前屐痕還訥訥，下有青絲與白髮。白髮搔短青絲長，酒漿無以潤枯腸，於今遊人來四方。嗚呼，但見桑田滄海時相逐，誰解高山彩雲慟且哭。

明潭

留春畢竟留不住，閒坐品茗見白鷺，誰植檳榔細呵護，陰陰翠色滿茶樹。吆喝不見採茶郎，人在茶田第幾行？殺青重焙餘韻長，日月凝成琥珀光。忽聞遠處聲嘈雜，吳語相問京調答，呼嘯直登慈恩塔，碼頭船舶猶紛沓。肝膽氣盛心憂煩，涵碧處處懸赤旛，此恨無關漢與番。噫歎！多少邵族逐鹿頭社北，回望潭水激豔奇萊黑。

埔里

中心石碑高幾仞，不偏緣何衰難振？造化寡情忽一瞬，重鑄天地誰指認。雖有禪寺與教堂，懷善護持是城隍，詎料世間太蒼桑，八方秋風入愁腸。楓香催紅出眼底，採盡筴筍無菰米，紹興百金勝清醴，鯉潭無復淨如洗。遙想梅社諸先賢，泛月徵詩意悠然，古今景殊難比肩。吁咈！試問歐公環滁之為樂，總在醉醒之間存林壑。

廬山

地牛翻身山脊斷，樹頹牆傾碎石岸，令人想見雨漫漫，如織遊客已星散。耆宿閒坐思華年，馬赫坡社社址遷，塔羅灣溪日生烟，仙境榮華兩難全。吊橋暮色朔風凜，獨行橋上虜如鉞，湯沸橋下曰可飲，曾癒野鹿稱一品。鹿去徒留櫻與梅，鳧鳥有意且徘徊，對此孰忍盡餘杯？悲夫！名同東晉淵明種豆地，終是興衰有別倩誰記？